

PAAVORO ITIONCAJIAQUENERI EPESOQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncajiaquenerigueti tsaromentajiacarica Jesoshi choocajianquitsica guinteninintsiqui pajitatsica Epeso. Irraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacanicarica. Irocashi itioncacotaqueri irira Paavoro otsipaquei paperiqui (Ya. 7.57–8.1; 9.1-31; 13.1–28.31), aisa itioncacotaqueri ichoocaquegueti Paavoro Epesoqui paperiqui Yantajiguica 18.19–20.1; 20.17-38. Tequeratagueti intioncacaanteroji ocatica paperi, itioncacaantaquero otsipa mavite paperi itigarancajiaquenerica quemisantajiatsica choocajianquitsica Tesaronicaqui, aisa mavite paperi itioncacaantajiaquenerica Corintoquitica, aisa otsipa paperi itioncacaantajiaquenerica choocajianquitsica quepatsiqui icantajitica Garashia, aisa otsipa irashi quemisantajiatsica choocajianquitsica Iromaqui. Chooca quenquejajianquitsica tequeratagueti intioncacaantajiaqueneri Epesoquitica, itioncacaantajiaqueneri Piripoquitica. Paavoro itioncacaantaquero 3 paperipae ajagantsiniqui

60, ichoocaquegueti santanaqui Iromaqui: aparo itioncacaantajiaqueneri quemisantajiatitsica Epesoquitica, otsipa irashijia Corosaquitica, otsipa irashi Piremoni. Isotoanaquerogueti Tiiquico Iromaqui, yaanaquero ocatica 3 paperipae yoanaquegueti quepatsiqui pajitatsica Ashia.

Ocaniqui paperiqui Paavoro icantaque, tequeratagueti impeacaguemparoji Aapani Irioshi maasano ipeacaacaca, itsatsitacaquea incapiocajiaqueriquea maasano quemisantajiaquerineca Jesoquirishito, irioca jorio aisa teeca irijorijoigueji, maasanoquea irimajirontajiajempari Jesoquirishito. Chooca 3 iquempetacaacaca Paavoro antsatantajiaquemparoca ichoocashirentacajigueti Quirishito quejetaca aparo anajiaje. Jero imaica: (1) aatimpajia aquejejiacaró tsovironaqui ipeacaajitaca mapipanco, irira Quirishito irio quejetacaró mapi anaantamajatanquitsica itampaticatacotantacaroca otsipapae (2.20-22); (2) aatimpajia aquejejiacaró tsinotsi, iriraquea Quirishito irio quejetacaró aguito (4.15-16; 5.23); aatimpajia aquejetacaró manquigarentsi, irira Quirishito irio quejetacari manquigatacajica (5.25-32). Icamantajiaqueri Paavoro maasano quemisantajiaquerica Quirishito irashimirintajiaquempari ampatsini, iquejetacaacari coareta Iromaquitica yashimirintagueti chooca yashimirintantaguetacaca (6.11-17).

¹ Naroguenti Paavoro itigarancane Jesoquirishito, iriotari nintacaaquena Aapani

Irioshi. Imaica nontioncajiaquempiqueate maasano aviatimpajia choocajianquitsica Epesoqui yashintajiacaca Aapani Irioshi, aisa tsaromentamajajigarica Quirishito Jesoshi.

² Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatoniji pishoshoventajigaro taaca opajitapae.

Icavintsajajiacajiquea Quirishito

³ Iintsija ashineventajiguempari Irioshite Amajirote Jesoquirishito, iriotaque aisa Iriri, ancantajiaque caaviji yoganejenca-majata. Irio cavintsajajiacajica ontaniqui inquitequi, icavintsajamajiacaji ashirequi yashintajiacajigueti Quirishito.

⁴ Coramani tequeratagueti impeacaguemparo quepatsi icoguiajiacajiquea inintacaajiacaji acancaniquea antsaromentajiaquempariqueate Quirishito ancomajatimentajiaquemparinijite aatoniji aco-vaeguishejiaja, aisa iramenimentajiacajiniji quejevaecaquea teeca ancovaeguishedimatempaji.

⁵ Aritarite iquejetaquero imaica icantsicaroquea paesatoniqui impeajiacaji irijanijiate, ipintsajiacajitarite, itigarancantacarica Jesoquirishito irimetojaventajiacaji, iriotarite nintanquitsi Aapani Irioshi irootaque iquejetancaroca imaica.

⁶ Iintsija ashineventajiaquempariqueate Aapani Irioshi irooriji icavintsajamajiacaji itigaranguimojiacajiriquea Irijanite ipintsamajataca.

⁷ Iriotaque oguisotoajiajaji yovegaratantacaji iriraja, ipeacojiacajiroquea

agovaeguisherjia, caavijitari icavintsajanti Aapani Irioshi, ⁸ icavintsajamajatantajiacajica, anaavaetaquetari itsamajare, iroomajaca iguenquejane. ⁹ Coramani teequeate antsajavetempaji intigaranquimojiacajiri Quirishito irimetojaventajiacaji, tequeratatirajatari ironigaanteroji icanquerica iroaqueragueti. Cotanquitsiquea imaica atsajiaqueroquea, jac netsanatapoja itigarancaqueriquea. ¹⁰ Icanquetarite coramani: “Noncapiocamajajajeriqueate maasano choocajiatsica jenoqui inquitequi jerijia aisa quepatsipaequitica cameetsaniji irimajirontajiaquempariniji Irijani Quirishito.” Oraqueate oncoramanitapojajegueti aapojempagueti irinetsanatanaguequemparoca, irinetsanataqueroqueate icanqueca.

¹¹ IcoGUIajiacajiquea aatimpajia tsaroven-tavaquemparineca Quirishito intsipatimentavajajiniji jenoqui inquitequi inquejetacamaajiacajiqueate irijanite. Coramanitari tequeratagueti onchoocatimagueteji inintacaitajiacajiqueate irashintajiacaji. Iriatimpaquea inintaquequea ariquea oncoguetanaquempani imaica, iriotaquequea amenaguequeroquea cameetsavaequequea.

¹² Inintaquetarite Aapani Irioshi noshineventajiaquempariquea naatimpajia, noncantajiaqueriquea iriguenti caavijica yoganejencamajata. Naroquetiquea pariacaro noquemisantajiaqueri Quirishito.

¹³ Ariquea piquejejiacaquea aviatimpajia iroompaquea piquemajiavaquerogueti Quenquetsatsarentsimajaca tsavetanquerica Quirishito meshiajiaquempineca, paventamaja-

jianacariquea, irootaquequea icoraquetantacaca
 Ishire Aapani Irioshi ichoocashirentaji-
 aquempiquea, pitsatantajiacaca aviguen-
 tijia irijanimajajiate. Aritarite icanque
 Aapani Irioshi coramani intigarancaqueri.
¹⁴ Arimajaquea itigaranquimojiacajiriquea
 Ishire, ichoocashirentajiacajiquea aatimpajia
 cameetsanijite antsatimentamajajiaquenijite
 irinetsanajiaqueroquea Aapani Irioshi maasano
 icantajiacajica, intsipajianacajiqueate jenoqui
 inquitequi incavintsajajiacajiqueate maasano
 aatimpajia yashintajiacaca. Iroosacanicate
 iintsija ashineventamajajiguempiriquea,
 ancantajiaqueri: “Poganejencamajata.”

*Paavoro yamanacoventajiaqueri quemisantaji-
 aquerica Quirishito*

¹⁵ Coramani noquemacojiaquempiqueate
 pitsariventajiacari Amajirote Jesoshi aisa
 pipintsamajajiacari maasano igomajamajarejia,
 irootaquequea ¹⁶ noquenquejantajiaquempica
 namanaqueriguetei Aapani Irioshi nocancaniquea
 nocantacoventajiaquempi: “Arioteesaa.”

¹⁷ Namanaqueriquea Irioshite Amajirote
 Jesoquirishito, iriotaquequea Aapani
 oganejencatatsica, namanacoventajiaquempi
 intsatacajiaquempi Ishire pintsatimenta-
 majajiaqueronijite maasano inintaguetica,
 aisa namanaqueri ironigaajiaquempi quero
 icota iriatimpa pintsatimentamajajiaque-
 riniji. ¹⁸ Namanacoventajiaquempiquea
 intsatacajiaquempi cameetsanijite pintsama-
 jajiaquenijite quero oncotanaquempani

oncoramanitapojajegueti anchoocajiaquegueti
ontaniqui iriatimpaqui, oganejencavaetacaquea.
Icajemajiaquempitarite incavintsajajiaque-
mpiniji irishinetacaamajajiaquempi. Ariquea
inquempetacaajiaquempari maasano igomaja-
majarejia. ¹⁹ Aisa namanacoventajiaquempiquea
pintsamajajiaque iriraquea Aapani Irioshi
iriguentiquea caavijica yagavejamajati
yanaajiaqueriquea maasano, yagavejacaanta-
jiacajicaquea aatimpajia atsaroventajiacarigueti.
²⁰ Pamenejate arimajaguitatsi yagavejamajati,
yonigaanquerotarite yagavejica coramani
ivochantajirigueti Quirishito imetojavetacagueti.
Ariqueate yaanajiriquea jenoqui inquitequi
yoguisavicajiriquea itincamijempequiqui.
²¹ Yanaamajatantajiacaricaqueate maasano
majirontaguetatsica, iramajirorepae,
agavejaguevetatsica, jivaguetatsica, maasano.
Yanaajiaqueriqueate maasano choocajianquit-
sica imaica jerijia aisa coajicajianajatsineca.
²² Aapani Irioshi yanaacaqueriquea Quirishito
yashintacaaguecariquea maasano, aisa
ipeacaavajari imajiromajajiate maasano
imeshiajiaqueca. ²³ Aatimpajia quemisantaji-
aquerica aquejejiacaroquea itsino Quirishito,
aroguentijia ichoocashirentamajataqueca.
Iriguentiquea peacaaguetacaró maasano
choocaguetatsica inetsanamajaqueroqueate
itsitacamajaguetaqueroqueate maasano.

Icavintsajajiacajiqueate Aapani Irioshi yaajia-jajiqueate

¹ Coramani oquejetacaquea metojajiaque pishirejia, pantajiavetacarotari icantimentaguetaqueca Aapani Irioshi, pipeacaajiavetacaquea covaeguisherentsipae. ² Irooquea pantapinijiavetaca, poguijatacojiaqueroquea iquenquejajiguica quepatsiquitica, piquemisantajiaqueriquea imajirote ampatsinipae quenaguetatsica otampijaguitetigueti. Iriatimpa iriguentitarite omperajigarica maasano pigatsajigarica Aapani Irioshi. ³ Aatimpajia maasano aritarite aquejejiavecariqueate iriatimpajia. Aquenquejaguishevetacaquea, aisa antaguishejiavetacaquea taaca opajitapae anintajiguica. Irootaquequea icatsimatantajiavecajica Aapani Irioshi, iquejetacaajiavetacajiquea iriatimpajia. ⁴ Cotanquitsiquea Aapani Irioshi cavintsajantamajatantatsica yagamajacomajajiacajiquea, caavijitari ipintsamajajiacaji, ⁵ yanijacaantajiacajicaquea ashirequi ometojashirentavetacajigueti agovaeguishere, itsipatacaantajiacajiri Quirishito yanijacaajirigueti. (Inchiquiojitaquea icavintsajajiacaji imeshiantajiacajicaquea.) ⁶ Ariquea itsipatacaantajiacajiriqueate Quirishito Jesoshi ivochantajiajajiquea, ariqueate yaajianacajiqueate jenoqui inquitequi yoguisavicajiavacajiquea iriatimpaqui. ⁷ Iquejetacaacajiquea imaica cameetsaniji oncoguitempaniquea intsamajajiaque maasano caavijiquea ipintsamajajiacaji. Aritarite icotaca iriatimpa, irootaquequea icavintsajantajiacajica

aatimpajia tsaromentajigarica Quirishito Jesoshi.
⁸ Inchiqiojitaquea icavintsajajiaquempiquea
 Aapani Irioshi imeshiajiaquempiquea
 paventajiacarigueti Quirishito, pamenajia-
 quetarite arimaja imetojaventajiaquempi.
 Teequeate inchiqiojitsita pimeshiajiguempaji,
 inchiqiojitsitarite inintaquequea iriatimpa
 irimeshiajiaquempi. ⁹ Tee onchoocateji
 ampeacaguempaca aatimpa ameshiantaquem-
 pameca, arimequea aventacoquempamequea.
¹⁰ Iriotaquetari peacaajiacaji Aapani Irioshi,
 imeshiajiaquempiquea aventaventaicarigueti
 Quirishito Jesoshi. Icantashitatijaiacajiquea anet-
 sanajiaqueroniji maasano cameetsaguetsica
 inintsitacaajiacajica coramani tequeratagueti
 anchoocajigueti.

*Ariquea aquejetavacaajiacaquea maasano
 tsaromentajigarica Quirishito*

¹¹ Imaicaqueate imaica aviatimpajia teeca
 pijorijoigueti, iintsijate pinquenquejajeroja
 queroqueate picojiavetani coramani,
 manatarite teequea inconoajiavetempiji
 jorioja yamenajiaquempiqueate teequea
 pinquejiguempariji iriatimpajia itotsaiqui-
 jitirogueti ichonquimashi, irootaquequea
 icantantajiaquempica teequea pintsajigueriji
 Aapani Irioshi. ¹² Pinquenquejajigueroja
 coramani teequea pintsajiavetempariji
 Quirishito, yamenaquempiquea teequea
 irashintajiaquempiquea Aapani Irioshi
 jero aisa teequea pintsajiavetemparoji
 icantajiaquerica Aapani Irioshi ishiraerijia

coramani irinetsanatavaqueneriquea incavintsajajiaquerigueti, teetari aviguenti igonorojia. Pichoocatashijiavetaca quepatsiqui, tecatsi poguijacovetempaji, teetari pintsajiavetempaji ininque incavintsajajiaquempi, teequea pintsajiavetempariji Aapani Irioshi. ¹³ Coramani teequeate pintsajiavetempariji Aapani Irioshi, quejevetacaquea pichoocavaetini jmm osamani. Cotanquitsiquea imetojaventajiaquempiquea Quirishito Jesoshi, osotoajatimentajiaquempi iriraja. Imaicaquea paventajiacariquea yaantajiavaquempicaquea, quisho yoajimpi.

¹⁴ Coramani maasano naatimpajia joriojia nocatsimaneguintajiaquempiquea maasano aviatimpajia teeca pijorijoigueji, tee pinquemisanteronicate itioncanaqueca Moishishini. Ariquea acatsimaneguintavacaajiavetaca, cotanquitsiqueate imeshiajiacajiqueate Quirishito, ipejairoquea acatsimaneguintacojiavetacaca. Imaicaquea teequea ancatsimatavacaajiajempaji, manaquea aconoavacajaianacaquea, yamenajiacajitari Aapani Irioshi ariquea aquejetavacajaijaaquea maasano quemisanquerica. ¹⁵ Imetojaque Quirishito itsinoqui aatonijite quericaca atsipeventajemparone irinetsanatajero itioncanaqueca Moishishini iroonijite irimeshiantajempa. Irootaquequea imaica teeca ancantashitatijaiguempaji, ariquea aquejetavacaajiacaquea maasano irioca joriojia iriguentica teeca irijorijoigueji. Imaicaquea aquemisantajiaqueriquea iriatimpa teequea ancatsimatavacaajiajempaji. ¹⁶ Imetojaventajiacajitarite Quirishito coroshiqui

cameetsanijite antsaromentajiaquempariniji,
 ariqueate imaica atsaromentajiacariguete
 ariqueate ashineventajiacariqueate Aapani
 Irioshi. Ariqueate iquejetaca iriatimpa
 ishineventajiacaji maasano. Imaicaquea
 imaica ariquea aquejetavacaajiacaquea
 atsaromentajiacariguete, teequeate ancatsi-
 matavacaajiajempaji icameetsatacojiaajitari.

¹⁷ Naatimpajia joriojia notsajiavetaro
 Icanqueca Aapani Irioshi, cotanquitsiquea
 teequea nontsaromentamajajiguempariji. Avi-
 atimpajiaquea teequea pintsatimajiavetempariji,
 cotanquitsiquea oraquea icoraquequitiguete
 Quirishito ariquea itsatacajaiacajiquea
 maasano aatimpajia quero ancojiaquempani
 antsaromentajiaquempariguete Aapani
 Irioshi arinijite antsipatavacaajiaquem-
 paquea aatonijite acatsimatavacaajiajatsi.

¹⁸ Imetojaventajiacaji Quirishito, irootaquequea
 nagavejantajiacaca naatimpajia joriojia
 nocancani noncoraquetashiqueri Aapani Irioshi
 namanajigueri, cotanquitsiquea teequea apaniro
 nagavejajigueji naatimpajia, pagavejajiguiquea
 aviatimpajia aisa pamanajigueri, iriguentitarite
 agavejacaacquempi Ishire Aapani Irioshi
 agavejacaajiaquenacaquea.

¹⁹ Coramani
 teequea pignonrontajiavetenaji, teequea pintsaji-
 avetemparinica Aapani Irioshi, cotanquitsiquea
 imaica manaquea piquejejianajana maasano
 tsaromentajigarica Aapani Irioshi, pitsaromentaji-
 acaritarite aviatimpajia aisa, irootaquequeate
 irijanintantajiaquempicaquea, ariquea
 agonorontavacaajiacaquea. ²⁰ Aquempejiacaro

aisa imapipancote itsinetacotica. Irirajiaquea itigarancanejia Jesoquirishito jerijia tsavetan-tajiguiroca icantajiaquerica Aapani Irioshi, irio quempejiacaroca mapicotapae isavijitica itsinetacotantamajatacaca cameetsaniji onquishomajatanaqueniji. Irraquea Jesoquirishito, irioquea quempetacaroca mapi anaantamajatanquitsica itampaticatacotantac-arooca otsipapae. ²¹⁻²² Imaica maasanoquea aatimpajia tsaromentajiacarica Quirishito aroguentijia itsovironaquite Aapani Irioshi, aroguentijia itemporote, ichoocashirentajiacajitarite Ishire. Yagavejacaajiacajiquea maasano antampishitavacaajiaquempaqueate antsaromentantamajajianaquemparicaquea. Pitsipajiaquenaqueate aviatimpajia aisa, pitsaromentamajajianacaritarite, aisaquea ichoocashirentajiaquemparitarite Ishire.

3

Isavicaventica Paavoro

¹ Naroguenti Paavoro isantanatacojitaqueca notsavetantaquerigueti Quirishito Jesoshi nosavicaventajiaquempigueti aviatimpajia teeca pijorijoigueji. ² Piquemacojiaquenampaquea icavintsajaquenagueti Aapani Irioshi itigarancaquenagueti nontsavetantimoji-aquempiqueate maasano aviatimpajia teeca pijorijoigueji. ³ Iriatimpa yonigaaquenaroqueate isenacavetacaca, itsatacaaquenaquea notion-cantavacarocaquea capichaji. ⁴ Imaica papat-sajavantajiaquerogueti pintsamajajiaquequea arimaja notsaquero maasano yonigaaquenaca

Aapani Irioshi yonigaanquerigueti Quirishito.
⁵ Coramaniquea tee inchoocateji caquinte tsataqueroneca, cotanquitsiquea imaica irira Ishire Aapani Irioshi icoguiajiaquenaquea yonigaajiaquenaroquea naatimpajia itigarancanejia Jesoshi jerijia aisa tsavetantajiguirica.
⁶ Jeroquea teeca intsajiavetempaji: Aapani Irioshi incavintsajajiaqueriquea maasano teeca irijorijoigueji quemisantajiaqueroca Quenquetsatsarentsi Oganejencatatsica tsavetacoquerica Quirishito Jesoshi, inquejetacaajiaquempariquea icavintsajajiguirigueti ishiraerijia quemisantamajatatsica. Oraquea icantajiaquerica joriojia coramani, ariquea inquejetacaajiaquempariquea iriatimpajia imaica, aritarite igonorontavacaaja.

⁷ Irooquea notsavetanque, icavintsajaque-natari Aapani Irioshi inintacaquenaquea nontsavetanqueri Jesoquirishito, irootaquequea inchiquiojitsitaquea iriatimpa itigarancaquena yagavejacaquena. Irootaquequea imaica nagavejancaca notsavetantaqueri. ⁸ Caavijiquea yanaajiaquena maasano itsipajia tsaroven-tajigarica Aapani Irioshi, cotanquitsiquea icavintsajaquea Aapani Irioshi itigarancaquena nontsavetantimojiaqueri teeca irijorijoigueji noncamantajiaqueri quero icota Quirishito, caavijiquea icavintsajamajiaqueri.
⁹ Iriaquea Aapani Irioshi peacaaguetaroca maasano igantagaquea coramani inintaque irimeshijitajeri teeca irijorijoigueji, cotanquitsiqueate mana isenacacovecaroquea ininqueca. Ariquea itigarancaquenaquea nontsatacaja-

iaqueri quero incojiaquempa cameetsanijite irimeshiimentajiajeriniji. ¹⁰ Ariqueate iquejetaca imaica ininquequea irimeshiajiaqueri quericaca tsaromentajiaquemparineca iroonijite intsa-tantajiaquempaca maasano majirontajiaatsica choocajiaatsica jenoqui inquitequi jerijia aisa agavejajiaatsica choocajiaatsica inquitequi caavijiqueate itsamajaque Aapani Irioshi. ¹¹ Igantagaquea coramani iroaqueraguete inintaque irimeshiajiaqueri maasano tsaromentajiaquemparineca Amajirote Quirishito Jesoshi. ¹² Imaica atsaromentajiacariquea teequea antsaroajigueji amanajiguiriguete Aapani Irioshi, atsajiaquetarite igantagaquea iquemajiacaji. ¹³ Imaica pitsajiaquequea choocatirajana acaniqui, isantanatacojiquna natsipetacaquea, cotanquitsiquea pishinejiguempaquea aatoquea pishimampoanajiajatsi, aviguentijiarite natsipeventajiacaca.

Paavoro yamanacomentajiaqueri Epesoquitica

¹⁴ Irootaquequea nogueroventantacarica Iraapanite Amajirote Jesoquirishito. ¹⁵ Iriguentitarite ashintajigarica maasano tsaromentajigarica, irirajia choocajiaatsica jenoqui inquitequi jerijia aisa choocajiaatsica acaniqui quepatsiqui, icantantajitarica “irijanijiate Aapani Irioshi”. ¹⁶ Iriatimpa iriguenti caavijica yoganejencamajata, aisa caaviji yagavejamajati, irootaquequea namanantacarica nocanqueriquea nonintaque iragavejacaantajiaquempiri Ishire, intampishitacajiaquempi intsompogui

pishirequi. ¹⁷ Namanacoventajiaquempiquea
 aisa nocanqueriquea noninque inco-
 guitempani inchoocashirentajiaquempi
 Quirishito, piquemisantajiaqueritarite.
 Noninquequea taaca opajitapae pantajiaque
 picancaniquea pimpintsatantamajajiaquempa,
¹⁸ iragavejacaajiaquempiniji aviatimpajia
 aisa maasano itsipajia igomajamajarejia
 pintsajiaquequea caavijiquea yanaaque
 ipintsamajajiaquempiquea Quirishito.
¹⁹ Atsajiavetacaquea ipintsamajajiacajiquea
 Quirishito, cotanquitsiquea aatoquea
 agavejajiguitsi antsamajajiaqueroqueate,
 anaamajaquerotari apintsatantajigagueti
 aatimpajia caquinteja. Cotanquitsiquea
 nonintaquequea pintsamajajiaque caavijiquea
 yanaaque ipintsamajajiaquempiquea.
 Pintsamajajiaquerogueti ariquea pinquen-
 quejamajajiaqueriquea Aapani Irioshi aisa
 inchoocamajajiaquempiquea.

²⁰ Caavijiquea yagavejamajataquequea
 iriraquea choocashirentajiacajica, yagavejaque
 iranaamajatavaqueroquea taaca opajita
 amanaquerica, jero aisa maasano anquen-
 quejavequempaca. ²¹ Irootaquequeate imaica
 maasano aatimpajia quemisantajiaquerica
 Quirishito Jesoshi iintsija ashineventa-
 jiguempariquea Aapani Irioshi. Iintsija
 acancaniquea ashineventajiaquempariquea.
 Cameetsaquea inquejejaquempa aisa maasano
 anchoviquijianaqueca, incogitempani
 intsaroventajiaquempari ajagantsinipaequi. Ari
 oncoquempa.

4

Icantajiaqueriqueate intsipashirentavacajiaquempa maasano tsaromentajigarica Quirishito

¹ Notsavetacotaquerigueti Amajirote, irootaquequea isantanatacotimentantajique-narica. Imaica noncantajiaquempiquea pincomajamajiaquempaquee pinetsana-timenqueroniji inintacaquempica Aapani Irioshi iroaqueragueti icajemajiaquempigueti. ² Aatoquea panaanatavacajiga, pincavintsajava-caajiaquempaquee, pamenacojianaquempaquee intati irantashijitaquempigueti. Pimpintsatava-caajiaquempaquee pantsiperejacotavacaajiaquempa. ³ Imaica piquemisantajiaquerigueti Aapani Irioshi ichoocashirentajiaquempiquea Ishire, iriotaquequeate agavejacaajiaquempica pitsipatavacaantajiacaca cameetsa, piquemava-caajia. Cotanquitsiquea pincoguitempani pinquejijianaquempa imaica. ⁴ Maasanotarite aatimpajia tsaromentamajajigarica manaquee atsipatavacaajiaquea quejecaquee apanironica achoocajiaque, apatirotitarite ichoocaque Ishire Aapani Irioshi choocashirentajiacajica. Aisa maasano icajemajiacajiquea Aapani Irioshi cameetsaniji incavintsajajiacajiniji oncoramanitapojajegueti ontaniqui jenoqui inquitequi. ⁵ Chooca apatiroti Amajirote, apatiroti aventajiacaca aatimpajia maasano, apatiroti aviñacajatimentajiacaca maasano. ⁶ Chooca apatiroti Aapani Irioshi, iriguentiquea Aapanite aatimpajia maasano. Iriatimpa iriguentiquea Amajirojiate maasano, iriguentiquea

agavejacaajiacajica maasano, aisa iriguentiquea
choocashirentajiacajica maasano.

*Icantashitatiacaaguecajiquea yagavejacaajia-
cajigueti Quirishito*

⁷ Caaviji icavintsajamajajiacajiquea Quirishito
maasano, cotanquitsiquea icantashitatia-
caaguecajiquea maasano yojocaguecajigueti
yagavejica antajiaqueneriniji inintacaajiacajica.

⁸ Itioncacojiquerigueti quea coramani ocanti:

“Yoanaji jenoqui, ijivajianaqueri yaajiaqueca
yanaajiaqueca.

Ariquea yojocajiaqueneriquea caquinteja ininta-
caajiaquerica.”

⁹ Imaica ¿taaca opaji oncanque “yoanaji
jenoqui”? Jeroquea oncanque aritarite
iquenapoji iroaqueragueti ontaniqui jenoqui
inquitequi icoraquequitigueti acaniqui
quepatsiqui. ¹⁰ Iriraquea quenapojatsica jenoqui
inquitequi iriotaquequea atsomajanajatsica,
yoavaetanaji jenoqui yavisanajiro inquite,
intsitacamajaguetaqueronijite maasano,
yanaajiaqueriquea maasano. ¹¹ Iriatimpaquea
yagavejacaajiaqueriquea quemisantajiguirica
irantajiaqueneriniji inintacaaguetaquerica:
iconoagarantajiacaquea ipeacajaiacariqueate
itigarancane; itsipaquea ipeacajaiacariquea
tsavetantajiguiroca icanquerica; itsipaquea
yagavejacaajiaquerigueti yaanaqueroquea
Quenquetsatsarentsi Oganejencatatsica, itsave-
tantajiaquero; itsipaquea ipeacajaiacariquea
quempoguijajiguirica quemisantajiatatsica

itsatacajiaiqueriqueate. ¹² Ariquea iquejetacaajiacajiquea maasano aatimpajia yashintajiacaca cameetsanijite agavejajiaqueniji amitacotava-caajiaquempa antampishitavacaajiaquempa arinijite anquemisantamajajianaqueri Quirishito maasano aatimpajia quejejiacaroca itsino. ¹³ Acancaniquea anquejejianaqueroquea imaica arejevaetapojempa antsipatavacamaajiaaquempagueti maasano, anquemisantamajajiaqueriquea Irijanite Aapani Irioshi, aisa antsamajajiaqueri. Ariquea anquenquevarishirentanaque, anquejemajaquempariquea Quirishito. ¹⁴ Aatoquea aquejejijaaritsi chaajaniquipaetirajaca tequeratatirajaca intsajigueji, shinetimentajiatstirajaquea taaca opajitapae icantajiquerica. Aatoquea aquemisantajiguiritsi cantashitataroca Iguenquetsatsare Aapani Irioshi. Iriatimpajiarite itsanirojiguitari yamatavijantajigui, manaquea inintajiaque intati iramatavijajiacaji aatoniji aquemisantamajajiajiritsi Quirishito. ¹⁵ Cotanquitsiquea aatimpajia iintsija ampintsamajajiguempariquea maasano, ancantamajataquequea anquenquetsatacaajiaquerigueti arimpanijite anquenquevarishirentanaquequea arejevaetajemparoniji anquejejianaquempariquea Quirishito anetsanajiaquerogueti maasano inintacaajiacajica, iriguentitarite Amajirote. ¹⁶ Iriguentitarite agavejacaajiacajica antsipatavacaaantajiaquempacaqueate asavicaventajiaquerogueti taaca opajita ininqueca iriatimpa, maasanotarite icantashitatiacaaguecajiquea yagavejacaajiacajigueti antajiaque

taaca opajita inintaguetica. Iroosacanicate
 maasanojia asavicaventamajajiaquerogueti
 ariqueate anquemisantamajajianaqueriquea
 antampishitavacaajianaquempaquea ampintsatavacaamajajianaquempaquea.

*Aatoquea piquejejijaatsi tequeratagueti
 pinquemisantajigueji*

¹⁷ Imaica noncantajiaquempiqueate aatoja
 piquejejijaaritsi teeca inquemisantajigueji
 quenquejaguishejiatsica intati, teenicate
 irininteji Amajirote pinquejejiajempaquea
 imaica. ¹⁸ Iriatimpajia ipitsecaquenque-
 Janetanaque, teequea iranijashirenta-
 caajigueriji Aapani Irioshi aisa teetarite
 irinintajigueji intsajiaqueriquea, manaquea
 iquishoshirentajianaque. ¹⁹ Iroguentiquea
 yantajigui yantaguishejiaquequea taaca
 opajitapae covaeguisherentsi, manaquea
 itsanirojiaquequea intati, teequea impashiv-
 entacajaiguemparoji, ishineventajiacarotarite
 intati. ²⁰ Cotanquitsiquea aviatimpajia teequea
 iro itsatacaajitaquempica pitsapojaquerigueti
 Quirishito, ²¹ arimajagueti piquemajiaqueri,
 arimajagueti iro itsatacaajitaquempi
 iroomajatatsica itsatacaantica Jesoshi. ²² Imaica
 aatoquea piquempejijaaquea paesatoniqui
 pantaguishejiavetacagueti covaeguisherentsi,
 aritarite picojiacani pishineventajiavecaroquea,
 manaquea amatavijajiaquempi. ²³ Imaicampani
 iroaqueraro oncantanajempa pishire aisa
 piguenquejane. ²⁴ Piroaquerashirentajianaje,
 irotaquetari ipeacamentantajiaquempica

Aapani Irioshi pinquempejiaquempariniji iriatimpa, comajashirerimajaca pincantajempa, pincomajamajajianajempa.

*Icantajiaqueriqueate quero incotajempa inco-
majamajajiaquempagueti*

²⁵ Aatoquea pmatavijajiajiritsi pigonoropae, manaquea pincantamajataque, aatoquea pican-tashita intati, maasanotarite aatimpajia man-
aquea atsipatavacajaicaquea intati atsaroventa-
jiacarigueti Amajirote Jesoquirishito.

²⁶ Piquemavaquerogueti oncoraquetaquegueti pigatsimare, aatoja picovaeguisheta, taamp-
inaquea pimpetsimarejajianaje tequeratagueti
ompitsequeji, ²⁷ aatonijite yagavejajiguimpitsi
ampatsini incovaeguishetacaajiaquempiquea.

²⁸ Iriraquea aitsitantajiatsica ariotapojaque
paitsiantaque, manaquea pincatsiquetaque
intati, irooca pantajiaque otsipa cameetsague-
tatsica irootaquequea onchoocatantaquempaca
pincavintsajanquemparica coguitejacojianquit-
sica.

²⁹ Aatoquea picantaguishetitsi, manaquea
pincanquequea cameetsaguetatsica ami-
jiaquerineca quemisantajiaquempineca
pintampishitacaantajiaquemparica. Cameet-
saquea pinquenquetsatacaajiaqueri irooquea
pincavintsajanquemparica. ³⁰ Aatoquea pishi-
mampojancacaajigaritsi Ishire Aapani Irioshi,
iriotaquetarite itigaranquimojiaquempica
Aapani Irioshi ichoocashirentajiaquempiquea,
quejetaca iseyotaquempi intsatantajitaquempaca

aviguentijia irashimajaca arejevaetantapojem-
paca savincaguiteri iraantajivajerica Amajirote
maasano yashintajiacaca.

³¹ Imaicaquea pimpishoncajero picatsi-
mashirentajiguigueti, aatoquea picatsima-
jencajaji, manaquea povashiantanajero
pigatsimaca. Aatoquea pitampishijencatan-
tajaji, aatoquea picantashitari itsipapae.
Povashiantajianaqueroqueate maasanopae
covaeguisherentsi quejecaroca ocatica.

³² Pincavintsajajiaqueriqueate pigonorojia, aisa
pimpintsamajajiaquempariquea. Aatoquea
picatsimashirentiri itsipa querocaguete
incoquempini, manaquea pimpeacotajemparo
intati, pinquempejiaquempariqueate Aapani
Irioshi ipeacotsitajimpiroguete picovaeguishe-
jiacaguete, aatoquea icatsimatimentimpiro,
paventajiacaritarite Quirishito.

5

*Icantajiaqueriqueate inquejejiaquempar-
iqueate Quirishito*

¹ Aviatimpajia aviguentijiatarite irijanijiate
Aapani Irioshi ipintsamajajiacaca, imaica
pinquejejiaquempariqueate iriatimpa.

² Picancanija pimpintsatantamajataquempa,
quejetaca Quirishito ipintsamajajiacaji ipiman-
tantacaroca imetojane imetojaventajiacajiquea.
Irootaque oquempetacarocameetsajencatatsica
yojocajitaquenerica itaajitaquenerica Aapani
Irioshi, ishineventavacaro.

³ Aatoquea poashitimajiguirotsi manquigar-
entsi teeca irooquea pimanquigare. Ari

pinquejejaquempaquee aisa manquigarentsijia,
aato poashitiritsi shirampari teeca irio
pimanquigare. Aatoquea piquenquejacotima-
jiguirotsi taaca opajitapae covaeguishetatsica.
Aato pinintsigueteri yashintaguecaca itsipa,
aisa aatoquea pinintavaque pinintavaque.
Icoguiajiaquempitarite Aapani Irioshi
pincomajamajiaquempaniji. ⁴ Aatoquea
piquenquejajiguitsi taaca opajitapae oguipashiv-
entajantatsica. Aatoquea picantaguishejigui
intati, aisa pinquenquetsataquegueti
aatoquea piconoantavacaro covaeguisherentsi,
manaquea pinquenquetsajiaque cameetsa
pishineventajiaquempariqueate Aapani Irioshi
cavintsajiaquempica. ⁵ Pitsamajiaquetarite
aato yogui ontaniqui imajirontaguetei Quirishito
jeri aisa Aapani Irioshi quericaca oashitiroca
manquigarentsi, jeri aisa antaguishtiroca
taaca opajitapae covaeguisherentsi, jeri aisa
nintsiguequerica itsipa yashintaguetacaca, jeri
aisa quejearica irinintavaque irinintavaque.
Irraqueate nintatsica irajaarantamajaquempa
quejevaetacaquee manacaquee iroguenti
irioshivijique irajaararopae. ⁶ Inchiqiojitaja
yamatavijajiguimpitsija cantashijiatsica
intati. Icatsimamajiguiritarite Aapani
Irioshi maasano quejiguiroca imaica
teeca irinintajigueji inquemisantajigueriji.
⁷ Irootaquequeea noncantantajiaquempica
aatoquea pitsipaguishejigaritsi iriatimpajia.
⁸ Paesatoni oquejeveca pipitsecacojiaque
iroorijite pantaguishejiavetacaqueate taaca
opajitapae covaeguisherentsi teenicate

pintsajivetempariji Aapani Irioshi,
cotanquitsiquea imaica pitsajiaqueriquea
piquemisantajiaquerigueti Amajirote,
quempecaquea itsirencacotapojajimpi.
Irootaquequea noncantantajiaquempica:
arimpaquea pinquempejianajempariquea
choocatatsica savincaguiteriqui, manaquea
pincomajamajajianaquempa. ⁹ Maasanotarite
tsamajajiguirica manaquea icavintsajantajigu-
iquea intati, icomajamajajigaquea, aisa icanta-
majajiaquequea, teequea iramataajiguempaji.
¹⁰ Irooquea pintsajiaque ishineventaguetaca
Amajirote. ¹¹ Aatoqueate pishineventi-
majjaarotsi maasano yantaguishejiaqueca
irirajia pitsecacojianquitsica, manaquea
pincantimentantajiaqueroquea, teetarite
irishineventemparoji Aapani Irioshi. ¹² Aato-
ocameetsati anquenquetsaguishetacotsitanta-
querogueti taaca opajitapae yantaguishejiguetic
imanavecaca, oguipashiventajantitarite
intati. ¹³⁻¹⁴ Cotanquitsiquea aviatimpajia
pincomajamajajiaquempagueti, iriraquea
antaguishejiguiroca covaequisherentsi
inchiquiojitsitarite iriatimpajia iramenajiaque-
mpa manaquea icovaequishejiaca, iroompaquea
arica irinintajiaquequea inquejianaquempi
aviatimpajia inquemisantajianaqueriquea
Quirishito. Irootaquequeate itioncacoji-
querogueti ocantiquea:

“Pintinajanaquequea aviatimpa maanquitsica,
aviatimpa metojanquitsica pimpochatanajequea,
ariquea intsirencacotaquempiquea Quirishito.”

¹⁵ Imaica pincomajajiguempaqueeate aatoquea piquempejijaaritsi teeca intsajigueji, manaquea pinquejejaquempariquea tsajatsica icomajajigueti. ¹⁶ Pisavicaventamajajiaqueroqueeate pantsipeventamajajiaquempariquea Aapani Irioshi imaica, choocatarite oshequini antaguishejiguiroca covaequisherentsi. ¹⁷ Irootaquequea noncantantajiaquempica aatoquea piquejigari teeca intsajigueji inquejajigue, manaquea pincantajiaqueriquea Amajirote intsatacajiaquempiro maasano inintaqueca pantajiaqueca. ¹⁸ Aatoqueeate pishinuijiga, piquenanaquetsiqueate picovaequishetatsi. Irooqueea pinintamajate inchoocamajatanaquempi Ishire Aapani Irioshi. ¹⁹ Pinquenquetsatavacaajiaquempaqueea, pincantsitemparoqueea ocanqueca amashairentsipae itsarorentantajitarica Aapani Irioshi. Pamashaiventajiaqueri Amajirote, pintsaroven-tamajajianaquempariquea onquenavaetanaque pishirequi. ²⁰ Paventajiacaritari Amajirote Jesoquirishito imaica, iintsija pincoguitempani pishineventajiaquempariquea Aapani Irioshi pincantapinitaqueriquea: “Arioteesaa”, iroorijite icoguitaniquea icavintsajajiaquempiquea.

Quero incojiaquempani inchoocajiaqueniji cameetsa manquigajatsica aisa imanquigare

²¹ Arigueti pitsarorentamajajiacari Quirishito aatoquea pinintajiguitsi panaanaatavacajiaque-mpaquea, maasanoqueea pinquemisantavacaaji-aquempaja pamitavacaajiaquempaqueea intati.

²² Manquigarentsijia, pinquemisantamajajiaqueri manquigatimpica quejetacaquea piquemisanquerigueti Amajirote. ²³ Iiraqueate shirampari iriguentitarite jivatiroca imanquigare iquejetacariqueate Quirishito ijivajiguirigueti maasano tsaromentajigarica, aisa irioquea meshajiaquerica. Iiraquea Quirishito yamenajiaqueri quemisantajiatsica quempetacaquea iriojia itsino, Quirishito irio quejecaroca iguito. ²⁴ Aritarite oquejetacaquea imaica maasano tsaromentajigarica iquemisantajiaqueriquea Amajirote Quirishito, ariquea onquejiaque-mpaquea manquigarentsijia onquemisanta-majajiaqueriqueate manquigataroca, aatoquea opigapigatsajigariquea.

²⁵ Shiramparijia, pimpintsamajajiaque-mparoqueate pimanquigare, pinquejeji-aquempariqueate Quirishito ipintsamajajiacarigueti maasano tsaromentajigarica, iquejetacaacari imanquigare, ipacaro imetojane imetojaventaqueroquea, ²⁶ cameetsanijite irogameetsantajiaquero, apanironijite irashintajiaquemparo. Isaancantacaro iquivantacaro oja aisa iguenquetsatsare.* ²⁷ Ininquetarite iramajero intsipataquemparo, aato opintatimata, aato otsiñoamagoti, aato ochoocati quejecaroca, manaquea oganejencataquempa oncameetsamajataque.

* **5:26** Coramani ontaniqui Joreaque yamejigaca irooshipojigueti irimanquigajitaquemparo manquigarentsi, otsipataca onquivamajataquero aisa onetsanamajataquero onquitsaatajempari saancamorenaro teeca ontsiñoamagoteji.

Ariquea inquejetacaajiaquempari maasano
 igapiocane, iroganejencatacaajiaquempari.
²⁸ Imaica aviatimpajia shiramparijia,
 pimpintsajiguemparojate pimanquigare
 pincavintsajiaqueroquea pinquejetaca-
 ajiaquemparo pipintsajigagueti aviatimpa.
 Irraquea cavintsajiroca imanquigare irisatiquea
 cavintsajaatsi. ²⁹ Tecatsi sematsine itsino
 iriatimpa, maasanoquea acavintsajajiacaquea
 ashecajiacaquea aatonijite ametojajiguetsi,
 aisa amenanontajiacaquea aatoniji taa
 oajigaji. Ariqueate iquejetacaajiacariqueate
 Quirishito maasano tsaromentajigarica
 ipintsajigarigueti. ³⁰ Aatimpajia aisa
 tsaromentajigarica maasanoquea atsip-
 ajacariqueate atsaromentamajigarigueti
 quejevaecaquea aroguentica itsino, irootaque-
 quea icavintsajantajiajajica. ³¹ Ariquea
 itioncacojiquerogueti ocanti: “Irootaquequea
 imaica shirampari intsinampirejanaqueriqueate
 iriri aisa iriniro, quisho iroamajataquero
 imanquigare, apatsinoroquea incantanajempa.
 Ariquea iroaqueragueti tequeratagueti
 irimanquigatemparoji, mavite icarajiavetaca,
 ariquea imanquigacarogueti ariqueate icojianaca
 tee irimavitetajempaji, quempetanajaqueate
 apatsinoronica icantaja.” ³² Omanavecaquea
 ocatica, cotanquitsiquea mana nocantajiaque-
 mpiroquea irooquea pintsatantajiaquempara
 ariquea iquejetacaajiacajiquea Quirishito
 maasano aatimpajia atsaromentajigarigueti.
 Itsipajiacajiqueate iriatimpa quejevaecaquea
 aparoquea acantaja, quishoquea yoajiacaji.

33 Noncantsijajempiqueate aisa maasanopae shirampari impintsamajataquemparoqueate imanquigare, incavintsajaqueroquea inquejetacaaquemparoquea icavintsajagueti iriatimpa. Aisa maasanopae manquigarentsi on-quemisantamajajiaqueriquea manquigataroca.

6

Quero incojiaquempani irijanintajiatsica aisa irijanijiate

¹ Aviatimpajia chaajaniquipaetirajaca, arigueti piquemisantajiaqueri Amajirote inique pinquejetacaitempariquea piri aisa piniro pinquemisantajiaqueriqueate, caavijiquea ocameetsati pinquejetaquerogueti imaica.
²⁻³ Paesatoniqueate Aapani Irioshi icantavecariqueate Moishishini taaca opajitapae, ariquea itioncacoguequeroquea cameetsanijite irinetsanajiaquero avaesatinijiateni, cotanquitsiquea teequea incanteji irinetsanajiaqueroguetiquea maasano osamaniqueate inquishojiaque acaniqui quepatsiqui. Cotanquitsiqueate choocaquea apatiroti icantaquerica irinetsanataquerogueti osamaniquea inquishojiaque acaniqui quepatsiqui, irootaquequea oatica: “Pinquenquejacameetsatacotaquerija piri aisa piniro.”

⁴ Aviatimpajiaquea irijanintajiatsica, aatoquea picatsimatacaashijigaritsiquea intati pirijanijiate aisa porijanijiate, manaquea pintsatacaajiaqueriquea maasano icanqueca

Amajirote, aisa pincantomajajiaqueriquea
irantajiaquegueti covaeguisherentsi.

*Quero incojiaquempani yashintajitaca aisa ash-
incarica*

⁵ Aviatimpajia yashintajitaca, pinquemisanta-
majajiaqueriqueate ashinquempica acaniqui
quepatsiqui, aatoquea pipigapigajigari
manaquea pintsaroacaajiaquempariqueate,
aisa aato pamatavijajigui, manaquea
pincatsiquejiaqueneriqueate quempecaquea
iriguentica picatsiquejiaqueneca Quirishito.

⁶ Aatoquea apatiroti pinetsanajiguirotsi
icantajiaquempica yamenajiaquempigueti
irooqueate pishinetacaantajiaquemparica,
picancaniquea pincatsiquemajajiaquequeate,
iriotaquetari ashintamajaquempica Quirishito,
aviguentijatarite irajaanirejia Quirishito.
Pinintamajajigueja pinetsanamajajiguero
maasano inintaguetica Aapani Irioshi.

⁷ Pinetsanamajatanaqueroja incanquempigueti
ashinquempica quejecaquea irioquea
pantamajaquene Amajirote Quirishito, aatoquea
aparoquea pishinetacagari papicaquinteteni.

⁸ Pitsajiaquetarite iriraquea Aapani Irioshi
irishineventajiaquempariquea maasano antiroca
cameetsatatsica, irivegarajiaqueneriquea. Inque-
jetacaajiaquempariquea irirajia yashintajitaca,
jerijia aisa teeca irashintajitempariji, maasano.

⁹ Aviatimpajiaqueate ashintajigarica
caquinte yojocantajitica, iintsijate pinquen-
quejajigueroquea ocatica. Choocaqueate
apaniromajaca ashintajiguimpica aviatimpajia

jerijiaquea aisa pashintajiacaca, iriotarite
 pimajiromajate choocatatsica jenoqui
 inquitequi. Iriatimpaquea yamenajiaque-
 mpi teequea pincantashitatijaiguempaji,
 ariqueea piquejetavacaajiacaquea maasano.
 Irootaquequea noncantantajiaquempica
 pincavintsajiaqueriqueate pashintajiacaca,
 aatoquea picatsimajiguiritsi.

*Quemisantajiatsica iquejetacariqueea ashimir-
 intajiatsica*

¹⁰ Napitsaroventarijiate, apanivaniqueate
 noncantajiaquempiqueate, aviguentijiarite
 tsaroventajigarica Amajirote imaica pamaner-
 iqueea pincantajiaqueri intampishitacaamaja-
 jiaquempi, aisa iragavejacaamajajiaquempi,
 caavijitarite yagavejamajati. ¹¹ Iriaqueate
 ashimirintajiatsica yashimirintavacaajiacagueti
 iroguentiquea yaventajiga iguishoritepae
 aatoniji isatajajitiri. Imaica aviatimpajia
 pinquejejanaquempariqueea paventajianaquem-
 pariqueate Aapani Irioshi irojocajiaquempiquea
 maasano pimpigatantajiaquemparica
 ampatsini aatonijite yagavejajiguimpitsi
 yamatavijajiguimpitsi. ¹² Aatimpajiaqueate
 teetari iriguenti ashimirintajiguempa
 choocatanquitsica itsino, iriraja. Iriguentijiaquea
 ashimirintajiaquea majirontajiavetanquitsica
 teeca inconijajigueji, irirajia tigarancajia-
 querica quemisantajiaquerica, iriguentijia
 agavejajiaquerica pitsecashirentacojianquitsica
 acaniqui quepatsiqui, iriguentijia ampatsinipae
 quenaguetanquitsica inquitequi peacagaroca

covaeguisherentsi. ¹³ Irootaquequeate
 nocantantajiaquempica imaica, pinquejetem-
 pariquea ashimirintatsica yaventarogueti
 iguishoritepae, paventamajajiaquempariquea
 aviatimpajia Aapani Irioshi yojocaquempitari
 maasano pimpigatanquemparica ampatsini
 pagavejajiaqueniji pintampishitashitimenta-
 jiaquerinijite incoraquetashijiaquempigueti,
 aatonijite yagavejajiguimpitsi, manaquea
 pinquemisantamajajianaqueriquea Aapani
 Irioshi.

¹⁴ ¡Pintimanaqueshiatsi! Picancaniquea pinquen-
 quejajiaqueroqueate maasano arimajatatsica
 teecaquea amatavijanteji, oquejetacaquea
 yoishotacomajatacarogueti ashimirintatsica
 ichompimashite. Pincomajamajajiaquem-
 paqueate pinquejetantanaquemparicaquea
 ashimirintatsica yavencarogueti isavonegui-
 tacaca. ¹⁵ Quejetacaquea irira ashimirintatsica
 icavimajatanacaqueate cameetsanijite
 iranijitantanaquemparonijite, ariqueate
 pinetsanatanaquempaquea poajianaquequea,
 pinquenquetsatacaapojeriquea caquintepae
 pintsatacaajiapojeriquea Quenquetsatsarentsi
 Oganejencatatsica inchoocatantajiaquempaca
 cameetsa. ¹⁶ Aisa choocaquea ashimirintatsica
 iticaancaca, iticaantavacaroquea shiquiripi
 morecatsica aatoniji iquentajitiri. Aisa aviatimpa,
 paventamajatanaquemparija Aapani Irioshi,
 pinquemisantamajatanaqueeriquea aatonijite
 yagavejimpitsi ampatsinipae incovaeguisheta-
 caaquempiquea. ¹⁷ Aisa, quejetacaquea
 ashimirintatsica yasatirijarogueti cavorejatatsica

ichoocatantajaca, pintsamajiaquequea
 arimajaquea imeshiajiaquempi Quirishito
 pinchoocatantajempaca. Chooaquea aisa
 ashimirintatsica itsaampimenirite yagave-
 jantarica yashimirincaca. Oquejetacaroquea
 Iguenquetsatsare Aapani Irioshi yojocajiacajica
 Ishire agavejanquemparicaquea ampatsinipae.
¹⁸ Picancaniquea pinquenquetsatacaqueri
 Aapani Irioshi, pamanamajapinjiaqueriqueate
 pincantajiaqueriquea incavintsajiaquempi
 iramitacojiaquempi. Pinquemisanqueriquea
 Ishire intsatacaajiaquempigueti querocaca
 pincanqueni. Pinquenquejamajajigue
 pamanaquerigueti, aatoquea piperajigarotsi.
 Picancaniquea pamanacoventajiaqueri maasano
 tsaromentajatsica.

¹⁹ Pamanacoventajiaquenaqueate naatimpa
 aisa, intsatacaguenaniji Aapani Irioshi
 quero noncanqueni aatoniji notsarogui
 nontsavetanquerogueti Quenquetsatsarentsi
 Oganejencatatsica teeca intsajivetempaji.

²⁰ Aapani Irioshi itigarancaquenaquea
 nontsavetanqueroquea, irootaquequea isan-
 tanatacotimentajitaquenaca yoishoitsijitanaquea
 cavorejatsariqui. Pamanacoventajiaquenaja
 cameetsanijite nontsavetantaqueronijite,
 pincantaqueriquea intampishitacaaquena
 aatoniji notsaroacagarotsi, irootaquetari
 inintacaaquenaca.

Interoncacaajianajerica

²¹ Ariquea ichoocataquequea apitsaroven-
 tarite Tiiquico apintsajigaca. Iriatimpa

yantamajatiniriqueate Amajirote. Imaica nontigarancaqueriquea iroanaquequea avi-atimpajiaqui pinquemacotimentajiaquenaniijite, inchiqiuojitsitarite incamantajiapojempiroquea maasano.

²² Irootaquequea nontigaranquimenquerica irishinetacajaiapojempiquea intampishitacajaiapojempiquea.

²³ Imaica, napitsaromentarijiate, non-intaque irishinetacajaiaquempi Aapani Irioshi jeri aisa Amajirote Jesoquirishito inchoocatacaajiaquempiquea cameetsa, aatonijite taaca opajita pishoshoventajiajatsi, aisa intampishitacajaiaquempiquea pintsaromentamajianaquempariniji, aisa pimpintsatavacaajiaquempaniji.

²⁴ Aisa nocanqueriquea incavintsajajiaqueriquea maasano pintsamajiauitarica Amajirote Jesoquirishito.

**Iroaquerari Itioncacaantaqueca Aapani
Irioshi: Tsavetacoquerica Amajirote
Jesoquirishito
New Testament in Caquinte (PE:cot:Caquinte)**

copyright © 2008 Wycliffe Bible Translators, Inc.

Language: Caquinte

Translation by: Wycliffe Bible Translators, Inc.

Caquinte[cot], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Caquinte

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files dated 29 Jan 2022

83ba253d-55c7-5686-b0d2-bfc8d1efc0d5